

A PEPPi CARUSO

Na vota ci fu un mulu caricatu
quannu si vitti mezzu addibbulutu
d'un voi, vosi essiri aiutatu
viremma stancu, quasi addichinutu;
ma quannu chi lu mulu fu arrivatu,
pi ringraziarlu ci dissi (curnutu)
tannu ci rissi lu voi a lu mulu,
l'amicu un servi pi na vota sulu.

Staju chiangennu pi lu dispiaciri
e stu poviru cori m'allammicu;
nun ci criria c'havia a finiri
la nostra stima di ddu tempu anticu,
staju scrivennu ittannu sospiri
e cu lu sangu all'occhi ti lu dicu:
«Peppi tu pi triccentumilaliri
ti stai vinnennu lu chiù megghiu amicu».

Ma raggiunannu cuscinziasamenti
vulennu l'amicizia stimari:
essennu versu a mia ricunuscenti
avissi anchi pututu avvicinari;
o ssu curaggiu tu nun ti lu senti?
mancu s'hai un liuni d'affruntari?
li picciuli di restu sunnu nenti,
vulennusi n'amicu rispittari?

NI CUNTINTAMU SEMPI TUTTI DUI

Havi vintanni chi ni canuscemu
e oggi 'nfacci a tanti dimustramu
chi veramenti beni ni vulemu
e di li premi nun si gilusiamo,
a tutti i banni d'unni emu emu,
quannu ch'un primu premiu pigghiamu
dintra li nostri cori lu spartemu
chiangennu pi la gioia n'abbrazzamu.

Mentri supra sta terra ancora semu
megghiu di patri e figghiu ni stimamu.
Si mai doppu quannu chi muremu
e di stu munnu vili n'arrassamu
quannu chi 'mparadisu poi trasemu
dunn'è chi voli Diu ni sistimamu.

(Turi Sucameli - Guglielmo Castiglia)

LA ME' CARRERA

Nel maggio 1958 sono stato invitato a partecipare ad un concorso di Poesia. La Poesia è stata premiata, e la giuria mi ha chiesto una fotografia e la mia carriera letteraria, jò mi l'accurdai accusì.

Nun mi parlati di la me' carrera,
mannò mi 'ncazzu sorti tappinara,
nascivi sutta sta cilesti sfera
e fazzu a stentu na vitazza amara.
Pi scola friquintavi na pirrera,
maniannu picu, zappuni e mannara,
pi mangiari m'ha passu a la leggera
e pi lu friddu sbattu l'angulara.

SI CONUSCI

Si conosci a lu cauru l'estati
e l'arvulu robustu a li radici,
si conosci un Pueta a li sparati
lu bon suldatu, a li so' cicatrici;
si conuscinu 'nfacci l'onurati,
si conosci a li pinni la pirnici;
«'ncarceri, malatii e nicissitati
si conosci lu cori di l'amici».

L'ESPERIENZA D'UN SCECCU

Un gnornu visitai na fatturia
forsi di qualchi anticu principatu,
la guvirnava Turi Pitralia
un'omu tuttu cori, assistimatu;
m'accumpagnau 'nta la scuderia
d'unni chi n'arristai meravigghiatu,
un sceccu quant'un mulu ci tinia,
e na parigghia di vistiola allatu.

E ghiennu chiacchiariannu mi cuntava
tutta la pruprità chi pussiria,
quannu di na finestra s'affacciava
tuttu lu feu sott'occhiu l'havia,
e primi acqui l'aratra 'mpaiava
e tutti li nugghiati si rumpia,
poi a lu tempu si li siminava
cu dda granni parigghia chi tinia.

Ogni matina prima ch' agghjurnava
don Turi a la virsana si mittia
cu tant'amuri l'aratra maniava
e tuttu l'jornu chi ghia e vinia;
di la finestra lu sceccu taliava
ma iddu stessu un si pirsuaria,
cu la so' testa chi fantastichiava
quantu granni pinzati chi facia.

Na sira doppu un gnornu di pinzari
ci dissi a ddu vistiolu c'havia allatu:
si voi lu me' cunsigghiu nun mangiari,
pi quatrujorna fingiti malatu;
risolvi pi na vota! un ti scantari!
e tutta a notti ti stai curcatu;
quannu dumani veni pi 'mpaiari
puru s'abbuschi t'à stari aggiucatu.

Difatti lu nnumani a stessa ura
comu facia lu tempu passatu
grapi la stadda cu tanta primura,
ma quannu vitti ddu voi curcatu,
subbitu curri pi la mangiatura,
ma ddu vistiolu unn'havia mangiatu,
l'amminazzau, lu spingi p'a cura
ma d'armaleddu ristau aggiucatu.

Chi cunfusioni poviru patruni,
poi sutta la botta chi pinzau?
Si ricurdau c'havia un varduni
e supra lu sularu lu trovau.
Si lu scinniu 'nterra cuntintuni
subbitu a lu sceccu ci lu 'nzaiau
e poi senza né cuntù, ne raggiuni
lu sceccu cu vistiolu lu 'mpaiou.

Però ci vinni 'ntesta lu pinzeri
quantu lu sceccu nun si strapazzava,
misi supra lu voi lu cunzeri
la punta juvu lu sceccu purtava.
Stancu nun putia chiù stari 'mperi
puru puntariddati suppurtava,
finia a la sira quannu chi scurau
a 'granni stentu a la strada arrivau.

Ma stancu stessu happi lu pinzeri
usannu lu giudiziu c'havia,
sai dumani soccu ti succeri?
chiangennu a ddu vistiolu ci dicia:
st'jornu chiacchiariava c'un vucceri
capivi chi parlavanu di tia,
«s'agghjorna arrè malatu jò ti chiamu,
dumani stessu veni e lu scannamu».

E finalmente comu vosi Diu
cu ddi minzogni chi ci ammadduccau
a ddu vistiolu si lu cunvingiu,
lu fenu e la guverna si mangiau.
Quannu chi lu patruni si susiu
e 'nta la stadda la luci addumau,
vasau la terra filici e cuntenti
e 'mpaia lu vistiolu novamenti.

Lu sceccu doppu c'happi st'esperienza
si sbarrachiau lu so' sintimentu
e va' dicennu: riflettici e penza
si mentri campi voi stari cuntentu.
Poi p'aviri sta ricunuscenza
lu vosi scrittu 'nta lu tistamentu:
«siddu chi guai nun voi passari
fatti li fatti toi, nun ti 'ntricarì».

LA SO' MERDA LU TRARIU

Tempi addietru o me' Paisi
da me' casa appressu strata,
vinni un nobili burgisi
di na nobili casata.

Era un'omu tuttu cori
v'assicuru sull'onuri;
scarsuliddu di palori
ma un bravu agriculturi.

Doppu setti mal'annati
ci dicia a so' muggheri
chiui nun fazzu siminati
fazzu nautru misteri.

Pi sett'anni un si ricogghi
chiui nun pozzu siminari,
si mi mettu supra i mmrogghi
pi pagarli comu a fari?

M'accattassi un strippuneddu
o di crapi, o picuriddi
mi bastassi un picciutteddu
pi cummattiri cu iddi.

Lu tirrenu u pussiremu!
è di nostra prupità,
un casottu ci l'havemu
na stagiuni stamu ddà.

Na stagiuni a tutti banni
c'è mangiari unni v'è v'è,
du zabbari e quattru canni
e na mannara si f'è.

E difatti accus'è fici
centu pecuri accattaru
mischineddu era filici
chi facia lu picuraru.

Ma però pi mala sorti
la sfurtuna si ci 'nmisca
na matina trova morti
un capuni e na rinisca.

Ci fu un lupu na nuttata
di dd'attornu chi passau,
comu 'ntisi la maniata
dintra a m'annara s'atau.

Lu patruni all'alba chiara
tutti dui li scucciau
'nta na punta di zabbara
poi li peddi l'appizzau.

Ma lu lupu gran latruni
di dda allatu un s'arrassau
e la peddi du capuni
na nuttata s'a pigghiau.

Restu friddu, loccu e mutu
soccu fici ddu schifu
di na pecura vistutu
'nmezzu i pecuri s'innu.

Ma di dda nun s'arrassava
d'irisinni un penza chiu,
ogni notti ni scannava
parti una e parti dui.

Era figghiu da za' Sciannara
stu garzuni diligenti
mentri chi scupava a munnara
vitti un strunzu differenti.

Lu pusau 'nta na gnuni
nun lu misi a munnizzaru,
lu va' a pigghiari cuntintuni
e ci lu porta o picuraru.

Ci ristau friddu e musciu
nun capennu lu pirchi,
nuddu armalu jò canusciu
chi fa strunza d'accussì.

Tisu tisu comu un palu
pari strunzu di cristiani
o mannò di qualchi armalu
c'assumigghia a qualchi cani.

Ma stasira poi si viri
si n'aiuta la fortuna,
jò m'assetu a lu valiri
li controllu a una a una.

N'emu a fari pirsuasi
stu gran strunzu d'unni vinni
ogni pecura chi trasi
jò ci toccu cosci e minni.

Lu so' turnu tannu vinni
comu vosi la fortuna
a lu postu di li minni
ci trovau du buttuna

e ddu poviru patruni
ristau friddu, loccu e mutu
sutta a peddi d'un capuni
c'era un lupu travistutu.

LU ZITAGGIU DI JACHINU

Baciu li mani a lei don Colavitu.
Addiu, Jachineddu, a ghiri ccà?
Parlannu cu vossia mi fici zitu
cu lu cunsenzu di mamma e papà,
la mamma voli chi lu vegno a 'n vitu
sabatu sira l'accordu si fà.
Ma è qualcuna di lu nostru situ?
pozzu sapiri macari unni stà?

La terza porta dopu ssi balcuna
di l'angulu si viri a malappena;
dda picciuttedda snella longa e bruna
la figghiastra di donna Filumena;
«mizzica, Jachineddu fai fortuna
ha fattu cinqu figghi ed è ancora prena».

STENTU PERSU

Ora mi ni pintii cari culleca
pirchì nun'ascutavi a me' zà Jaca;
sempri dicia: poi fari billeca
di li to' vuci nuddu si mmriaca;
siddu c'un Santu cu' firi si prega
sicuru fà miraculi, si sbraca;
ma 'nveci li Pueta di Paceca,
arrestanu attaffati 'nta la naca.

P'arruspigghiarli, chi fazzu? ci sparù?
fici du' anni chi mi sgargiu puru,
ma perdu tempu «Po' tu cuntù caru»
e nuddu abbunamentu ti procuro.
Mi spremu ci lu pasciu cu' cucchiaru
però sta genti cu lu cozzu duru,
parlannucci di nesciri dinaru
si sfascianu la testa 'nta lu muru.

Pi dillu veru, Pueta ci nne'
sarannu na ricina a si e no,
c'è littirati, viddani virè
ma cacanu di l'astracu però;
ficimu a cursa se' misi nnarrè
finu a la rara di mastro Totò,
e ringraziannu li carcagni me'
di tutti lu fissa sugnu jò.

POVIRI ITALIANI

A tutti l'italiani maturati
chi vi sintiti un populu gluriusu,
tutti sti pezzi storti difittati
pirchè nun li ittati fora usu?
Comu ddi carrittazzi scunucchiati
ch'unn'annu né miolu e mancu fusu,
ittatili a munzeddu e li bruciati
cangiamu stu governu virgugnusu.

Dicitimillu, ch'è chi ni spirati
si d'un governu un si ci po' fidari?
Hannu sempri st'incontri risirvati
'ntra iddi nun si ponnu cuntrariari
pirchè hannu tutti li manu 'nchiappati,
mancu li vavi si ponnu stuiari
«chiddu chi dissi Alessandru Natta
pirchè a tutti l'autri un ci appatta».

Chi scantu hannu, chi nesci lu vugghiu?
o chi succeri lu jocu scummogghiu?
Natta siddu succeri occhi 'mpirugghiu
lu veni a trova dunn'esti lu 'nmrogghiu;
stannu 'ngrassannu com'un toru sgugghiu;
comu pateddi affunciati a lu scogghiu,
pirchè nun ci sprimiti lu canfugghiu
a lu ministru di lu portafogghiu?

Lu prisidenti Francescu Cossiga
viri chi stu governu nun risisti?
Ni soffri mischineddu e s'allammica
ma nun si pirsuari, ancora 'nsisti;
Fanfani di risati si sbiddica
e Andreotti si teni a li visti,
«e l'upiraiu ch'ognuno lu sfrutti
havi a pinsari manteniri a tutti».

L'altu jornu ni vittimu a vista
unu un po' fari chiù l'arti chi fà,
pi quali scopu ddi du giornalista
foru privati di la libirtà?
Mancu successi all'epuca fascista,
chi s'abusava d'autorità,
sulu a pinzallu lu cori rattrista
chi scrissiru però la (VIRITÀ).

VIRTÙ DI LA SICILIA

Sicilia bedda nun mi cinsurari
si lu me' cantu nun'havi valia,
jò scola nun ni potti friquintari,
pi li nicissità di 'ncasa mia;
na stu radunu di Casteddammari
ch'ognunu canta la so' puisia,
jò analfabeta nun sacciu cantari
staju cripannu di malincunia.

L'Eternu Patri ti fici cumpleta
digna ti fici di granni pittura;
la to' biddizza supira la meta
supra la terra mentri munnu dura;
li to' figghioli, dotti o analfabeta,
mastri, mastricchi, viddani e pastura,
almenu na mità sunnu Pueta,
Pueta chi criò matri natura.

Quantu Pueta sparsi gnuni, gnuni,
na sta Sicilia ch'è la terra mia.
Turi Scuderi, Nardu Pipituni,
Nunziu e Gaitanu Petralia,
cu è chi conosciu a don Simuni?
Facia lu camperi a burrumia;
jò ci fu' se' anni a cumpagnuni,
e m'ammiscau la so' malatia.

Di lu Pueta la generazioni
nun è la stessa d'un omu nurmali,
unu pir'unu senza distinzioni,
analfabeta o 'ntellettuali;
ci su' Pueta né tinti né boni,
ma ci ni sunnu ch'unn'annu l'uguali,
chi sulì fannu certi discussioni
megghiu d'un avvucatu 'ntribbunali.

E ghiò nascivi tantu sfurtunatu
chi scola nun ni potti friquintari,
disprezzu lu distinu scilliratu
chi Gesù Cristu mi vosi assignari.
Tutta la vita haju sempri zappatu,
ancora vecchiu bisognu zappari,
da Puisia sugnu 'nnamuratu,
puru ch'un cantu mi piaci ascutari.

Grazi a la buntà di tant'amici
mi ficiru st'invitu capitari,
cu lu me' cori priatu e filici,
mi passi giustu di partecipari;
si m'accittati chiddu chi jò fici,
vi vegnu a trovu, vi vegnu abbrazzari,
comu ricordu di stu Pacicotu,
vi lassu lu me' cori, e mi nni votu.